

修輯河南府志序

河南府志自乾隆年間前守施公重修後
迄今百餘年矣刻板朽蠹錯簡尤多並有
散軼者若不及時修輯日久更難稽考文
獻無徵亦守是土者之咎也同治四年冬

河南府志序

肇鏞奉

天子命來守是邦下車伊始庶務紛如勤求治
理日昃不遑今春公事稍暇爰索藏書家
善本與及門錢少彭于厚菴兩廣文詳爲
校對朽蠹者修補之錯簡者釐正之散軼

者重刊之越五月而事竣因識數言於簡
端至於搜羅近事纂修而增益之則才學
識三者均有未逮以俟後之君子焉

同治六年歲次丁卯孟秋月河南候補道
知河南府事武進陳肇鏞謹序

河南府志序

河南郡之有志自宋學士宋公次道始序之者爲相國司馬溫公刻之者爲留守文潞公一時天下操觚之士翕然稱之爲良史才幼讀傳家集思見其書未得也乙未冬誠奉

聖天子簡命來守是邦適前守王公有事於志乘乃以調去屬余竟其業余曰非宋公之

序

一

書弗善也遂徧索之卒不得復取溫公之序細按之始矍然嘆曰作志之難果如是哉溫公之言曰次道之爲是書也因乎韋述之兩京記而其間宮室城郭山川津梁亭驛廟寺陵墓之名數與夫古先之遺迹人物之俊秀守令之良能花卉之殊尤無不備載十倍于韋記開卷粲然如指諸掌其真博物之書者與夫志輿地難志輿地

而及于三川郡則更難蓋自河洛開奇龜
龍獻瑞天地之大志已存乎其中而周營
漢都山河之雄深偉麗人才之磊落英多
名區勝景園苑香林爲宮闕爲宅里爲園
圃動者植者踵事而增華者學士大夫之
登臨而流連者真難以僂指計古人所云
擅六合之靈奇標八方之勝概洵不虛矣
然則欲爲紀載者豈不甚難哉惜乎次道

序

二

之書之不得一見也溫公又稱次道性嗜
學其先正宣獻公蓄書三萬卷次道自毀
齒至于白首從事其間未嘗一日捨置故
其見聞博洽當時罕有倫者噫由此觀之
次道之書誠善矣然則後之爲志者當何
如其難哉誠受事以來每惴惴焉懼不克
勝任而披覽舊志簡而未備求所謂粲然
如指諸掌者蓋不可得然後知宋志之失

傳也久矣會老友童君二樹今之博雅君子也延主此席復邀同郡之紳士相與商榷體例惟奉溫公博物一言爲圭臬廣覽墳典旣按部以就班更振綱而挈領一事必尋其原一人必考其實無臆說亦無濫辭閱兩歲書成編爲卷一百有二十爲綱二十有二爲目一百十有四非敢誇多前人實由運際郅隆生逢

序

三

聖世右文之日遺書盡出且得久于斯任以竭其旁叅博考之忱而又藉創始者先啟我以端也豈非誠之厚幸也歟抑予聞顏師古之言曰志記也積記其事也夫人生千百年後尚論千百年以上之事非載籍何所証據乎而舊志悉無之此誠數年來慎之又慎所以不敢仍舊者此也惜乎次道之書之不得一見也雖然天下不乏藏書

家他日有以宋志來者當亟刻之并倣其
例而續成之則是志亦可以無庸矣是則
所望於後之同志文獻者

乾隆四十四年歲次己亥仲春月河南府
知府會稽施誠謹序



序

四

舊序

河南郡志序

宋司馬光

周官有職方士訓誦之職掌道四方九州之事物以詔王知其利害後世學者爲書以述地里亦其遺法也唐麗正殿直學士韋述爲兩京記述故龍圖閣直學士宋君敏求字次道演之爲河南長安誌凡其廢興遷徙及宮室城郭坊市第舍縣鎮鄉里山川津梁亭驛廟寺陵墓之名數與古先之遺迹人物之俊秀守令之良能花卉之殊尤無不備載考諸韋記其詳不啻十餘倍開編粲然如指諸掌真博物之書也次道性嗜學先正宣獻公蓄書三萬卷次道自毀齒至于白首從

河南府志

舊序

一

事其間未嘗一日捨置故其見聞博洽當時罕倫且嫻習國家故事公私有疑咸往質焉又喜著書如唐書仁宗實錄國史會要集註史記之類與衆共之或專修而未成者皆不計外其手自纂述已成者凡四百五十卷蓋昔人所著未有若此其多也次道旣沒太尉潞公留守西京其子慶曾等奉河南志以請於公曰先人昔嘗佐此府敘其事尤詳惜其傳於世者甚鮮願因公刻印以廣之豈徒先人蒙不朽之賜於泉壤抑亦使四方之人未嘗至洛者得之如遊處已熟後世聞今日洛都之盛者得之如身逢目睹也幸公留意公從之且令光爲之序光於次道友人也烏敢以固陋而辭

河南郡志序

順治十六年

國朝 翁長庸

中川守三韓朱君修河南府志成余讀之不禁廢書三嘆也河南古豫州地居天下之中背邙面洛西澗東澗挾崤函之阻總風雨之交誠天地之隩區而九州之上腴也然地扼秦隴介趙魏四方之所必爭天下無事則已有事必先被兵自成周迄今不知歷幾盛衰而世運隨之故李文叔之言曰洛陽之盛衰天下治亂之候也周以前無論已周公營洛實始建邕召畢君陳相繼保釐化行俗美而天下大治周室中圯王綱解紐篡弑之禍日尋而洛人蘇秦申不害韓非之徒以縱橫法律之學分鑣並驅毒流宇內王風蕩然浸以滅亡此

河南府志

舊序

二

洛陽之一變也漢興吳公守郡奏最治平一時循良接迹海內向風故西漢之俗最爲近古光武卽位宅中圖大同符高祖建武永平之間天下稱盛治焉桓靈以降世衰道微水雹地震之變叠見東都馴至強臣竊國宗廟爲墟此洛陽之又一變也若乃夷甫之清談誤國季倫之後泰成風華林西苑之興荆棘銅駝之感隨風波靡江河莫返而五季之亂成矣唐宋之世禍亂間作滄桑代更上下數百年間其爲變莫可紀極而蛇鼠之鬪杜鵑之鳴識者有先事之慮焉未有洛邑治而天下亂者也未有洛邑亂而天下治者也迨勝國之末風俗日頽士大夫狃於宴安華侈成風卒致寇盜蜂起叛將

獻城之難作而中原土崩洛陽之變於斯極矣惟我

皇清統一區宇攬搶電掃羣克靡餘然後收京野之骨掃臺榭之灰雒之人復見太平而免於兵革歲己亥朱君來守是邦越二年政通人和百廢具舉所謂令修於庭戶數日之間而人自得於湖山千里之外者將於是乎在然而典物淪亡風流散失思夫城郭之巍峩宮闕之壯麗平泉花木之饒金馬承明之舊欲問其遺蹟而故址頽垣無復存者求之邱墟陵谷荒烟白露中宜朱君之愾焉嘆興也於是乎郡志一書起而纂修之會大中丞檄下郡國有事茲舉乃徵攷文獻敦禮鴻儒偕進士何君暨學博茂才共相釐正條分縷析綱舉目河南府志

舊序

三

張凡星野輿圖山川人物土田貢賦以逮文章節烈之數莫不犁然畢陳而朝市之變遷名園之興廢咸序而列之亦古今盛衰治亂之林也後之覽者俯仰興亡考鏡得失其必有以吳公之治平繼周南之雅化者四方將於是乎取則焉則是書也爲朝野之龜鑑爲史家之嚆矢而不徒以洛陽佳麗誇示後世爲騷人墨士登高作賦之一助也朱君之功其何可忘也是爲序

河南郡志序

順治十六年

國朝

朱明魁

曩令星沙聞漢南有召伯循行祠址未嘗不慨慕於分陝化被之遠也已亥報政以田功躡遷洛守迤邐自西得之道里

經歷長老傳聞覺當年營度規模赫赫若昨日事自維謫劣
濫膺茲土近聖人之居身親禮樂文章之化豈非吾生大幸
歟雖然抑猶有慮上下數千百年爲問周公召公其人有存
者乎其政有存者乎微獨周自漢唐宋以來亦復有存者乎
且也銅駝荆棘陵谷滄桑人物凋傷風流散失茫茫今古莫
知紀極論世者何從指而目之爲某人爲某地爲某事一一
操符契不爽哉曰有志在志與史相表裏其世系年表世家
列傳之類一準於史而書人書地書事較史爲詳所謂列國
之史此也志之功於方土綦重哉洛陽爲古帝王定鼎地風
土文物迥踰他郡觀班孟堅之賦李文叔之論得其指矣顧

河南府志

舊序

四

可使之湮沒弗傳耶洎於明季豫當秦寇之衝南郡實罹首
禍川原盈血城郭爲墟焚書坑儒之慘不烈於此此時卽欲
掇拾斷簡殘編其叩之王弼之塚乎苟留心世道之士從流
離患難中覩記忠孝節義情形登諸掌錄用俟將來嗚乎可
不謂難焉則修輯之必以其時蓋有然已恭遇

聖天子御極底定中原永清四海庶幾復見車書一統之盛焉

太中丞公方伯公拳拳檄修豫志將匹休分陝故蹟而重光
之甚盛典也明魁職在牧長且夙負斯志敢不黽勉以從爰
諏吉旦禮延博雅名儒鄉紳何君栢如博學彭君虞彥子衿
潘生景星賈生承德姬生用中董生正開局纂修分部蒐討

彙諸邑志乘芟其繁猥增所未備而折衷於洛之鉅公務期
謹嚴傳信無悖史裁而止諸君子畢智考訂無間晨夕勒成
一代良書明魁暨寮友單君教黃君綬首邑令楊君苞郡學
博侯君抒懷時過從而參閱焉計始事於己亥冬卒業辛丑
冬季付之剞劂再歲竣工書成受而讀之圖誌犂陳源流具
載如攬河嶽全勝焉如承周召遺風焉覈田賦則思女修織
衽男務耕耘之舊崇學校則追洛陽多士風俗爾雅之常披
人物之林可徵忠義疊見溯宦流之籍應知俎豆如新至於
藝文泉湧科第雲興益信文字啓於圖書賢豪鍾於嵩嶽矣
明魁因是而感焉洛邑居天下之中陰陽風雨所和會人稟

河南府志

舊序

五

中和之氣以生大都有豫象焉名之豫州義有取爾夫豫之
爲言舒也司牧者由繹斯義則保釐剛柔之道可推已姑無
舉其凡如召公化行南國遺愛甘棠樊公守河南治平爲天
下第一柳仲郢爲京兆政嚴明後出河南以寬惠是皆神明
於因地宜民之治者耳今生民兵燹之餘噢咻而長養之猶
慮弗逮况乎其以重典試也幾何不益鑒乎明魁不敏家乘
旣無治譜又未敢希秘授於金簡玉牒唯願與寮屬諸君手
此一編以當法戒庶無失修舉意哉謹序

河南郡志序

順治十六年

國朝

董篤行

中州之有志也始於唐韋機之兩京記迄宋宋敏求纂修焉

下元一變越元至明雖作者雲興如文靖公在著作之庭且三十年未聞有所補益豈所稱鄉先生實錄者耶況乎滄桑繼變舉禍之石甌之棠喬之笙半淪沒於青燐碧火間後起者又烏從而識其大識其小哉我

皇上平定中原誕敷文德選於衆俾郡伯朱公來守是邦蓋欲以典章文物爲治平第一務也下車二載餘政通人和河屬有爰得我所之謠焉治暇攬中州山川而悅焉會鄉之諸薦紳言及風土人物意將裒集而誌焉值大中丞檄下郡國謀以纂修事郡伯卽商於別駕單公司李黃公總其成延郡邑之名公碩儒三四人俱雪窗冰几中夜不輟逾月告竣而千

里來徵序於余余以河屬爲九朝都會地宅中據勝雖一郡之文獻而十二州之擘建千百國之風習悉指臂相關焉是必得燕許手筆以推重一時然後可余何敢漫爲序也乃郡伯爲余言曰吾於志首不過清其大綱如伊洛與河伯鬪撓而不濁繼不過嚴其紀錄如崧高之俯眎崑嶠堅方而峭大然後條理備經絡聯屬書摛詞指事類情雖氣象萬千大意如是而止余因取全志觀之其大綱清也紀錄嚴也條理備經絡聯也屬書摛詞指事類情氣象萬千視古唐宋志果爾又一變也其疆域形勝諸圖說近世無工畫者余亦不具論論其大者若彙人物以芟邑志之繁列鄉賢以補通志之略

巨宦蹟有紀矣必如東郊保釐等則錄之科目有紀矣必如治安對策等則錄之卽忠義亦有紀矣必類龍逢之直樂羊之妻者則錄之至重莫過田賦因田定賦計口編丁則畫一之全書具焉及所列學宮陵廟則

國家之大寶器藏焉至文以紀事先之以

王言我

皇
上蠲租之詔邁漢唐而爭光日月次之以奏疏詩賦蓋

昭代之文章又與班馬李杜並駕而驅於戲觀止已是役也郡伯與別駕司李持繩釐正一循於墨而分之者同人何萊公之雅諳史裁學博彭公擇之秉直嚴律諸生員姬生用中

河南府志

舊序

七

潘生景星賈生承德又皆按部而較正之余雖備員京華不遑共事一堂然有吾姪正侍諸先生側而卒業焉則余亦與有榮施矣是余又烏可以無序也倘

天子臨軒採謠問今天下有如治平吳公之得賈生其人者乎吾將執是以對

河南郡志序

順治十六年

國朝
傅景星

昔吳公守河南治平爲天下第一薦賈生陳王道述禮樂改正朔易服色基兩漢文治之盛杜當陽建盟津河橋造生民未有之功復以餘力註左氏春秋爲後世學者師資之二公者皆以事業著於洛中而或以薦賢開文治或以著作翼經

傳其炳蔚千古無兩也頃者大中丞檄郡邑纂修志書郡大夫三韓朱公以吳公之治行兼當陽之書癖府志之修舍公其誰乃復謙讓未遑延進士何君偕博士茂才職詳而分理之乃躬爲裁定藻飾焉迨如公孫僑之爲辭令博謀於馮簡子子太叔諸人而已因以潤色從事其後也書成徵序於余余自告老以來筆墨久疎且迫於賤事卒無須臾之間得竭志意幾欲效子犯不文之辭而誼有未安因念吾郡處天下之中天地之開闢在於是神靈之肇造在於是自河出圖洛出書羲禹已立萬世文字之祖徵四靈寶道之瑞矣蓋日月之所交也風雨之所會也明山大川之所拱衛也詩書禮樂

河南府志

舊序

八

之所基始也賢哲之所治教仁壽之所設施固累朝歷代之所號爲赤縣神州四海八荒之所于焉朝宗則效者也茲欲舉而志之粵稽往牒其書契所紀有關於吾里者自六經廿一史諸子百家以迨稗官野乘卽細及伽藍有記名園有記與他通都大郡不可同日語其盛衰廢興之跡關宇內之治亂與他通都大郡亦不可同日語故載筆之家患蒐討之未廣亦患猥雜而失體蓋憂憂乎其難之哉今斯志也披閱一過細大咸舉詳略得宜洵無間然矣然吾因之有愴然於心者河洛自古稱名都會余生長斯土猶及見其壯麗繁庶之舊而燹焰燎原城邑煨燼土田蒿萊銅駝在於荊棘士女聚

爲京觀雖晉永嘉唐天寶之亂不烈於此覩忘而追數疇昔如白頭宮女說開元遺事搔首顰眉形神憔悴伏几幾出涕今幸

朝廷政教日新大夫朱公高張化瑟庭羸之餘漸有起色名都繁庶之舊將復見焉衰之極盛之始此一時也則余讀斯志而愴然欲涕者又且三復斯志而有其喜洋洋者矣朱公行如漢吳公進爲輔弼携斯志於國門與金匱石室之史並傳蓋功不在杜元凱註左氏以翼經傳之下云

河南郡志序

順治十六年

國朝陳 爌

豫當天地之中而雒自姬公營京陰陽風雨所和會物華人

河南府志

舊序

九

瑞所鍾毓於山見嵩之巖嶠而正直於水見河之漾潏而紆迴南三塗北嶽鄙伊闕轅轅函谷武牢表裏形勝古稱京邑金城秦楚晉衛燕趙蜀魯咸輪蹄輻輳冠蓋奔走其郊有德易王無德易亡莫不以斯州卜海內之治亂焉前此流人沸羹血郭骨野澗瀍金谷鬼爲窟穴彌望桃林土濠蒿棘參天春燕無巢鼎邦灰燼郡且墮何有乎志志之散佚於諸故老大家名賢逸士之所掌錄者僉罔回祿如汲冢斷竹岐陽石鼓烏從而晰厥蒼素哀厥漏遺垂不刊之典書歟

聖朝應運御乾廓清中土稷榆伏莽次第草心青燐變而沃壤噉鴻變而垣墉佩劍變而買犢鵠面桃達變而絃誦經雅蒸

蒸郁郁復覩雉貢越裳學建靈臺之盛於是八郡州邑志悉告成凡星躔輿圖戶口賦役職官貢舉節義文辭傍逮百代方技仙釋要取其神益風俗闡述理道者一一可按籍而興也獨聖賢帝王忠孝之大者汗牛難載得之吾雒尤踵接於列代間矣故達觀灼識不第以斯州之盛衰卜海內之治亂抑將以斯州文獻之興替卜海內政教之盛衰也余曩珥筆承明金馬朝夕

講幄閱天下所上山川扼塞生齒版冊異域殊方入奉

王會者寧止千億百國迄今備藩百二歷覽神臯奧區屯金虎而通宏農唇控肘倚始信豫之與雍胥屹然拄撐天門地

河南府志

舊序

十

絡漣澶九曲伯仲華嵩班孟堅賦兩都而垂重乎東都旨哉茲際尉侯同力循卓茂登榮翁朱公祖以治行第一繼漢之吳公而卵翼噢咻陸渾邾鄒之區鳴吠相達石田鋪榮化洽周南乃更手郡志而晰其疑雁蒼素以明哀其闕略漏遺統貫洵國乘之楷模藝林之瑰瑋已爾兼欲使後之牧我卬穀退食梅花冰署間無競而練無猛而寬無鷙擊而磨定其於陰陽風雨物華人瑞不永有以作之範貽之祉也歟哉今

聖天子方開秘閣萃鴻儒一統全史綱張目維蒐輶軒之副墨輯稗官之纂述始必駕波冢掩石鼓以典謨訓誥之章勒日星鐘簴之紀裔皇奕禩其以吾雒之志之爲之嚆矢也然則

梁翁公祖嘉惠天中功詎遜姬旦營京下歟余故樂得而終之

河南郡志序

順治十六年

國朝

何栢如

栢如有事郡志博覽諸州邑紀載與二三同社分部較讐始事於孟冬脫藁於臘半旣付梓應有俚言跋其後栢喟然太息曰郡志之不修幾何年矣使需以歲時繙閱全史其所就尚有可觀乃經營芻劇紕繆多端栢之責也至析疑正譌苦心具在他若雲物風土山川秩官科第錢穀諸欸悉仍邑志不敢竄易一字人物應論時代也邑志輒序爵彼邱清吏曹廣文豈赫赫盛位何至今膾炙人口耶藝文必傳正人也洛

河南府志

舊序

士

八景詩不錄呂忠節而錄沈詩沈以刑餘之夫行固無取入詩數雜撰不足觀應刪去或曰存之洛人頌之已久也端人節婦必俟蓋棺論定生前列傳殊礙史裁或曰仍之善善不妨存疑也近者松山朱公盡節明室載入國史固也郡志特尊其名者郡公祖稟忠臣之嗣也寶豐尹黃公稱循吏第一汝志旣詳郡志復傳其碑者司李公祖五世清白吏之後也忠臣良吏食報不爽而太史公言天道無知是耶非耶栢自束首受書抵今纔幾春華耳弔勝國之遺編觀

興朝之實錄展卷相對感慨係之因念栢先世科名宦蹟累累先君子淑身示訓栢與家兄弟三售禮闈時代雖殊而淵